

«Signur Brand duess acceptar in'elecziun»

L'optica dal professor per dretg statal

CUN ANDREAS AUER HA DISCURRÌ
CLAUDIA CADRUVI / ANR

■ **La pps smanatscha da bandischar mintgin or da la partida che accepta in'elecziun selvadia sco cusseglier federal. Ils candidats han perfin stuì suttascriber ch'els renunziassan a l'uffizi sch'il parlament elegess insatgi che na sa chatta betg sin il ticket uffizial.** Co vesa quai ora ord vista giuridica? Èsi insumma legal da far suttascriber ina tala renunzia? *Andreas Auer*, anteriur professor per dretg statal a Turitg, dat pled e fatg.

Vus essas oriund dal Partenz sco Heinz Brand. Tge cussegliassas Vus ad el sche l'assemblea federala l'elegess tuttina anc la proxima mesemna?

Andreas Auer: Jau schess: Signur Brand, acceptai quest'elecziun! Igl è ina grond'onur sche l'assemblea federala elegia insatgi sco cusseglier federal.

Era sch'ins sa che Brand vegniss mess enorm sut squitsch da sia atgna partida?

Lura po el mussar curaschi. Quai è atgnamain in bun test.

Il curaschi da tegnair pitg? Dovran ins quel per in tal uffizi?

Gea, quel dovr'ins en mintga cas.

La pps ha fatg suttascriber ils anteriurs candidats ch'els n'acceptian betg in'elecziun selvadia. Tge schais Vus da quai sco professor da dretg statal?

Ord vista stget giuridica n'èn ni l'assemblea federala, ni ils parlamentararis, ni ils singuls candidats restrenschids: L'assemblea po eleger tgi ch'ella vul. Mintga parlamentari po dar sia vusch a mintga candidat – er ad in che na sa chatta betg sin il ticket da la pps. Ed er ils candidats che na sa chattan betg sin il ticket uffizial dastgan sa chapescha acceptar in'elecziun.

Cunterfai a la costituziun sche la pps pretendia talas suttascripziuns da ses commembers?

Uschè lunsch na giess jau betg. Igl è sa chapescha in'emprova considerabla da far squitsch. Jau schess ch'i saja malonest e fitg arrogant. I correspunda a la tenuta da questa partida ch'ins po er observar tar

l'uschenumnada Durchsetzungsinitiative. La partida fa simplamain valair ses agen interess e tschenta quel sur l'interess public da l'entir pajais. Quai è donn. Igl è in nov svilup. En sasez metta la pps mo sasezza en empatg. Ella fa grev la vita a sasezza ed a ses commembers.

Il parlament resta pia liber. Ma ils candidats che han suttascribit: Èn els obligads visavi la pps da refusar in'elecziun?

I sa tracta d'ina enelegientscha dal dretg privat ch'ils candidats han cun la partida, pia cun in'uniun. Ma in'uniun privata na po betg limitar la libertad dad eleger dal parlament. L'elecziun resta libra.

Savess ins ir avant dretgira per impedir che la pps fa squitsch sin tala moda?

Jau n'enconusch nagina pussaivladad da sclauder quai. Nus essan ina societad liberala: Mintga uniun ha sias statutas e dastga – entaifer l'urden public – far convegnientschas cun ses commembers. Na, jau schess ch'ins na duess betg ir la via giuridica. Igl è ina arma politica che la pps empova ora.

Ins ha adina puspè elegì candidats selvadis en il cussegl federal. Fiss gliez la dretga resposta encunter quest'arma?

Cunzunt tar ils socialdemocrats è quai capità pliras giadas. La pps sa preschentass en in tal cas sa chapescha puspè sco unfrenda.

1983 ha il parlament elegì Otto Stich encunter la veglia da la ps che aveva proponì Liliane Uchtenbagen sco emprima dunna en il cussegl federal. Pon ins cumparegliar questa situaziun cun oz?

Cumparegliabel è ch'il parlament n'ha betg elegì il candidat uffizial da la ps. Quai è pli tard puspè capità cura che la ps ha mess si *Christiane Brunner* ed il parlament ha elegì *Ruth Dreifuss*. Ma ins n'aveva mai pretendì decleraziuns da renunziar ad in'elecziun. La ps ha gi in meglra relaziun tar la democrazia che oz la pps.

L'agir da la pps correspunda in pau al sistem d'auters pajais europeics, nua che la partida pli gronda decida mintgamai tgi che vegn en la regenza.

Tar nus n'è quai mai stà uschia. Las partidas fan mo propostas e l'assemblea elegia. Lezza dastga senz'auter tscherner insatgi che n'è betg en la pps per la successiun dad *Eveline Widmer-Schlumpf*. I n'exista nagin'obligaziun giuridica per in segund cusseglier federal da la pps.

Enconuschais Vus auters cas, saja quai sin champ chantunal u communal, ch'ina partida ha fatg suttascriber candidats potenzials da renunziar?

Jau n'hai mai udi d'insatge uschia. En ils blers chantuns enconuschans ins gea il proporz voluntari per la regenza, ma per gliez na battan ins mai cun talas armas sco uss la pps sin champ federal. Plinavant vegn la regenza en in chantun elegida dal pievel.

La pps aveva pretendì cun in'iniziativa ch'il pievel elegia il cussegl federal.

Gea, il pievel ha refusà avant dus onns quest'iniziativa. L'emprim less la pps ch'il pievel elegia il cussegl federal, uss di ella tuttenina che la partida dastgia quasi decider sezza tgi che daventa cusseglier federal ed il parlament avess mo pli da dar il chau.